

Date – 07/07/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizorama Political Party te chuan Special Intensive Revision, 2026 Draft Roll tlangzarh tâka kum 2005 e-roll a zawmpui neilo te chu a nihna ang taka paih ni se an ti.
2. Aizawl Chaltlanga Tourist Lodge chu four star aia hniamlo mikhual thlen theihnaa siam turin sorkar chuan M/s Hotel Polo Towers Ltd., Shillong chu kum 30 atan inremna a ziahpui.
3. Assam Chief Minister Dr.Himanta Biswa Sarma chuan police ten ruihhlo zuarte chung a an chet dan chu a thlawp tlat tih a sawi.
4. Prime Minister Narendra Modia chuan India-Indonesia thawhdunna chak zawk siam a duh thu a sawi.

<><><>

ALL PARTY MEETING

Mizorama Political Party te chuan Special Intensive Revision (SIR), 2026 Draft Roll tlangzarh tâka voter belh leh paih chungchangah dan dik chiah loa electoral roll-a luh tumte dang tura lungrual taka thawhho an rel a; resolution siamin, "Kum 2005 e-roll a zawmpui neilo 'No linkage with last SIR' category-a awm chhinchhiahna sen a awmhote hi a nihna ang taka paih vek tha kan ti," an ti.

Vawiina Adviser to CM Pu Lalmuanpuia Punte kaihhruaia All Political Party Meeting New Capital Complex-a Civil Secretariat Conference Hall-a neihah he thu hi an rel a, meeting-ah hian political party tinte chu an aiawh mi 3 aia tam lo theuh tel tura sawm an nih angin - BJP, Congress, MNF, ZPM leh PC party aiawhte an tel.

Political party 5 aiawhte thukhawm chuan resolution 4 an pawm a, chungte chu - SIR 2026 Draft Roll lo chhuaka kum 2025 e-roll a chuang si, 2005 e-roll a zawmpui nei lo 'No linkage with last SIR' category a awm chhinchhiahna sen a awmhote hi a nihna ang taka paih vek te, chhinchhiahna enga chuang, rinhlelhawm deuha langte fimkhur leh uluk taka All NGO-te nen umzui te, SIR 2026 kal mekah Party tin ten lungrual taka hmalak a, inrawntawnna neih zel leh, SIR 2026 chungchanga All NGO-te hmalakna tha an ti a, an thlawp thute an tarlang.-

VC- *Vawiina All Political Party Meeting Aizawl thukhawm chuan SIR, 2026 Draft Roll tlangzarh tâka voter belh leh paih chungchanga hmalak dan turte ngaihtuahin, hmun danga pem tawh si, electoral roll-a la delete loh mi 13,978 an lo awm te, electoral roll-a chuang nawn mi 2,248 an awmte chuan ngaihtuahna a tih thui thu an sawi a; Electoral roll dik leh felfai tak neih a nih theih nan leh India khua leh tui dik tak chauh electoral roll-a an chuàn theihna tura thawktute tawiawm leh lungrual taka hmalakho ni se, an ti.*

Tuna an tih theih ber tura lang chu SIR 2026 Draft Roll lo chhuaktaah khan BLO-ten kum 2005 leh 2025 e-roll mapping an tih laia 2025 e-roll a chuang si, 2005 e-roll-a zawmpui an neih tir theih loh category-a an dah, ERO-te ruahmannaa hearing neih

ngei ngei turah hian Political party-te hian hearing neihnaah hian party aiawh tel vek tur leh dik taka tang ngam theuh tura in fuih ni se, an ti a; NGO-te thu ngaichang chung zela thawhhona tha neia, chu'nga dan dik chiah loa e-roll-a luh tumte chu dang vek tura hmalak tha an ti bawk.

(CORR Johnny)

<><><>

TAXATION DEPT

Sorkar kum kal mekah Mizoram Taxation department chuan thla 3 - April atanga June thla chhung khan chhiah cheng vbc 381 a hmu a; chhiah hmuh tam berna Goods & Services Tax (GST) atangin cheng vbc 273 hmuh a ni.

Kan corr report ngaithla ang,

Mizoram Taxation department-in chhiah an hmuh zat an tarlan danin, sorkar kum kal mek 2026-27 ah hian sorkar kum intanna April thla khan chhiah cheng vbc 209 hmuh niin a tam ber thla a ni a; May thla khan cheng vbc 92 leh June thla khan cheng vbc 79 hmuh niin, June thlaa hmuh hi sorkar kum kal mek thla 3 chhunga chhiah hmuh tlem ber thla a ni.

Petrol leh Diesel atanga sorkarin chhiah alakna Road Maintenance Cess leh Social Infrastructure & Services Cess atangin sorkar kum kal mekah cheng vbc 14 ve ve hmuh a ni tawh a; kumin April thla khan cheng vbc 12 hmuh niin a tam ber a, May thla khan cheng vbc 1 leh thla liamta June thla khan cheng nuai 63 hmuh a ni thung.

(Johnny CORR)

<><><>

TOURIST LODGE

Aizawl Chaltlanga Tourist Lodge chu four star aia hniamlo mikhuah thlen theihnaa siam turin sorkar chuan M/s Hotel Polo Towers Ltd., Shillong chu kum 30 atan inremna a ziahpuia, an inremna hi kum 10 dang tum hnih pawhsei theih dawn a ni.

Inremna hi Chief Minister Office-ah ziah a ni a. State sawrkar aiawhin Tourism Department Secy Pu Vanlaldina Fanai leh Company aiawhin Chief Financial Officer & Whole-time Director, Hotel Polo Towers Ltd Pu Prashant Gupta ten an ziaak a ni.

Sorkar thuchhuah tarlan danin, Chaltlang Tourist Lodge ti changtlung tur hian Mizoram sorkar chuan PPP Mode-a kalpuina tur ruahmanna a lo siam tawh a. Tihhlawhtlin a nih theih nan Ministry of DoNER hnuaia Invest India ten theihtawpin hma an lak pui a ni.

Sorkar duh dana Chaltlang Tourist Lodge tihchangtlunna tur hi Mizoram Public Procurement Rules, 2020 tlawhchhanin, chanchinbuahte Advertisement tihchhuah a nih hnuaah, May ni 16, 2025 khan State Procurement Portal-ah e-tender tih chhuah a ni a. Hotel Polo Towers Ltd. hi chhangtu awm chhun an ni. Endikna neih a nih hnuaah an chhanna hi engkimah an tling tawk tih hmuh a ni a, agreement hi ziah pui an ni ta a ni.

Inremna ziah atanga ni 45 chhungin a hmunhma hi Hotel Polo Towers Ltd. hnenah hian hlan tur a ni bawk.

Hotel Polo Towers Ltd. hi India hmarchhak-a hotel company lian ber an nih thu sorkar thuchhuah chuan a sawi a, tunah hian hotel 9 an enkawl mek a, hotel dang 7 lai hmalak mekna an nei a; chung zingah chuan Meghalaya, Tripura, Nagaland leh Indian Railways-te nena PPP project an kalpuite pawh a tel a ni.

(DIPR)

<><><>

LALDENG

MNF Founder President Pu Laldenga thihcham vawi 36-na pualin, Aizawla a thlan Treasury Square-ah MNF Party hruaihawtin sunna hun hman a ni a. MNF President, Pu Zoramthanga hovin MNF hruaitu thahnem tak leh chhungkaw lam ten zahna pangpar an dah a ni.

MNF President Pu Zoramthanga, Chief Minister hlui chuan thusawiin, Inremna hlawhtling ber leh ram zalen ber hlawhchhuah puitu, hnam hmangaihna chi Zofate thinlunga tuhtu, Pu Laldenga chuan hriatreng a phu a. A thihcham a lo thlen hian zahna chibai an buk nawn leh a ti. Hnamdangten Pu Laldenga hova remna hlawhtling neih chu an awt a, vannei an ti hle tih sawiin, thangtharten zalenna an vawnghim zel tur a ni," a ti.

Chhungkaw aiawha thusawitu, Pu Laldenga fanu, Dr. Reenee Lalrinzuali MNF Gen. Secy ni bawk chuan, Pathian ringtute tan, Amah Pathian leh mahni ram neihchhun tana ke pen chu a inhmeh hle a ti a. Hnam tana nunna hlantu zawng zawngte an zahawm takzet a, zahna an hlan tih sawiin, a pa thihcham puala hun hmangtu zawng zawngte chungah lawmthu a sawi bawk.

He hun hi MNF Treasurer Pu Lalruatkima chuan a kaihruai a ni.

MNF Sub Hqrs Lunglei chuan vawiin khan Mizo Hnamrun Lunglei ah MNF Founder President Pu Laldenga thihcham vawi-36-na pualin hun an hmang bawk a, MNF Sub Headquarters President Pu Vanlalthmuaka chuan Pu Laldenga chanchin mizo te tana Mizo Hnampa anihna Kawng hrang hrang te , Pathian mi anihna leh Mizo te tana independent zalena famkim kan neih theih natura ahmalakna te leh Mizo Nationalism tih chu Pu Laldenga leh akaihhruai MNF Party tello chuan sawi tel theihloh anih thu te a sawi.

Pu Laldenga hi Lunglei Pukpui a piang a ni.

<><><>

ZPM PAC MEMBER PRESS CONF

ZPM PAC member leh consultant Aizawl Chanmari Venga cheng Pu C Laltanpuia chuan ZPM policy kalpui mek chu a that

tawh loh avangin ni 14 chhungin policy tha zawh 14 puan chhuah a tum tih a sawi.

Aizawl Press Club-ah thuthar thehdarhtute kawmin, Pu C Laltanpuia chuan, ZPM policy a duah te chu hnawh a ni a, an hnawh chhan hi policy mumal leh inngahna tlak te neih vang a nih ringin a nghak a, amaherawhchu ZPM chuan policy tha zawh an neia a hmuh loh avangin a policy duan chu rawn auchhuah ve a tul a ti ta a ni a ti.

Pu C Laltanpuia chuan ZPM sorkar kum thum hmeh an hmuh takah kalphung thar a la hmu lo a ti a, mipui ngaihdaan pawh a nih hmeh a ni a ti.

Tuna ama duan policy a puan turte chu ZPM dona lam ni lovin, ZPM chu ram leh hnam dinchhuahna thlentu party, inngahna tlak a nih theihna atan hmalakna a ni tih a sawi a; mihring nunah hian chhungkuaah leh party-ah te pawh ngaihdaan a inanglo fo thin a, chu'ng hunah chuan a tha zawh thlan thiam a tul hle, a ti.

A policy siam 14-te hi youtube-a ama channel "C Laltanpuia" tihah naktuk zan atanga tichhuak tanin, Pathianni tel loin ni 14 chhung zan tir dar 7-ah a tichhuah dawn thu a sawi.

Pu Laltanpuia hian ZPM chhuahsan chu a tum lem lova, party chhunga awm chungin party policy siam that a tum niin a insawi bawh.

<><><>

IMD WEATHER

Indian Meteorological Department (IMD), Aizawl director Sudheer Kumar Dwivedi chuan, tunlaia Mizoram hmun hrang hranga fur khaw cheng mek chuan ni 2 vel ala awh dawn nia a lan thu a sawi a; fimkhur turin lirthei khalhtute leh mipui a chah.

Akashvani News Aizawl zawhna chhangin tun ni 2 lo awm turah khua a la cheng thei a, hmun thenkhatah chuan nasa taka

ruah sur thei a nih thu leh leimin tenau pawh thleng thei a nih thu a sawi.

Pu Dwivedi chuan mipuite fimkhur tura chahin, chhum a tam avangin lirthei khalhtute pawh fimkhur taka lirthei khalh turin a chah a; Disaster Management & Rehabilitation dept-in inkaihhruaina a siamte leh traffic rules-te zawm turin a ngen a ni.

Zoram hmun dang ang bawkin tukin atang khan Lungleiah pawh ruah a la sur nasa a, pawnlam a hnawktu hrang hrang, abikin kuthnathawk, loneitu, kawng siam, insa leh nitin chemtum leh tuthlawh nen a hnathawk a inhlawh te chuan hna an thawk thei lo tih kan corr chuan a sawi a. Kawngsir a nepnawi leh chawhmeh zuar te erawhin nihliap lian zar in rain coat an ha a, an hnathawh le eizawnna erawh an thulh phah lo. Lirthei a ei zawng te pawhin hna an thulh phah lova, kawng min thawn hriat tur a awm lo.

Tum dinhmunah ruah sur nasa vingin Agriculture kaihhnawih a lo nei leh huan siam a hnathawk te pawhin harsatna an la tawh lo niin Agriculture Deptt a thawk te chuan an sawi a, khawtlang tuipui pawhin Tlabung leh a chheh velah harsatna a la thlen rih lo tih Tlabung lam atanga thudawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ASSAM CM ON DRUGS

Assam Chief Minister Dr.Himanta Biswa Sarma chuan police ten ruihhlo zuarte chung a chet dan chu a thlawp tlat tih a sawi. Assembly-a Drug Free Assam motion sawihonaah Pu Sarma chuan tharum thawh zawnga chetna a awmin Police ten chhanglet turin thuneihna an nei a ti a. Ruihhlo zuarte an chhuinaah ruihhlo tawlhna kawngka ber chu Myanmar ramriah anih thu sawiin Mizoram leh Manipur kaltlangin ruihhlo hi tawlh thin a ni a ti a. Sawrkar laipui chuan ramri kana hetiang a ruihhlo tawlh do tur hian chak takin hma a la a ti bawk.

(Newsonair)



PM MODI

Prime Minister Narendra Modia chuan India-Indonesia thawhdunna chak zawk siam a duh thu a sawi. Vawiina Indonesia Parliament ah he thu hi sawiin Pu Modia chuan ram pahnih tana hlawkna tam tak a thlen tur thu leh khawvel remna leh muanna atan pawh a pawimawh a ti a. India leh Indonesia inlaichinna chu kum 100 chuanga upa tawh anih thu sawiin mipui rorelna ram an ngaihsannate, an inrintawnna leh hmathlir thuhmun an neihte chuan an inlaichinna a kaihruai tih a sawi.

Pu Modia hian vawiin khan Indonesia President Prabowo Subianto kawmin India leh Indonesia inkara thawhdunna hrang hrang an sawidun a. Hei bakah hian ram pahnih thawhdunna tur inremna Memoranda of Understanding (MoU) ziahnaah an telpui bawk a. Prime Minister Modia chuan chanchinbumite kawmin ralthuam, venhimna leh maritime sector lama thawhdunna tihchak zel an duh thu a sawi.

(Newsonair)



WC

FIFA World Cup 2026 khelh mekah tukin khan Round of 16 inkhelah Belgium chuan a thlengtu USA 4-1 in an hneh a. Belgium tan hian Charles De Ketelaere chuan goal hnih thunin Hans Vanaken leh Romelu Lukaku ten goal khat ve ve an thun bawk a. USA tan Malik Tillman chuan goal khat a thun ve bawk a ni. Zanin dar 9.30 ah Argentina leh Egypt an inkhel ang a, zing dar 1.30 ah Columbia leh Switzerland an intum bawk ang.

(Newsonair)

<><><>